

**Naaja H. Nathanielsen  
Attaviitsoq**

UPA 2016/133  
25. april 2016

**Namminersorlutik Oqartussat tamakkiisumik piginnittuullutik aktiaateqarluni ingerlatseqatigiiffiini ataasiakkaani siulersuisunut ilaasortassanik toqqaasarnermi nunatsinni najugaqavissut amerlanerussuteqartut ilaasortaasalernissaannik Naalakkersuisut aalajangersagaliorlutik inatsisissamik UPA2017-imi saqqummiussassamik siunnersuusioqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Suka K. Frederiksen, Siumut)

Suliffeqarfimmik ingerlatsilluarneq assigiinngitsorpassuarnik tunngaveqartarpoq. Pingaaruteqartut ilagivaat niuerfimmik ilisimasaqarneq summiiffinnilu pissutsinik ilisimasaqarneq. Taamaattumik siunnersuuteqartoq isumaqatigisorujussuudara, suliffeqarfinni pisortanit pigineqartuni, qaqugumulluunniit siulersuisuni ilaasortaqartariaqarmat nunami maani pissutsinik ilisimaarisqaqartunik. Nunamimmi ilinniartoqarsinnaangilaq, niuerfimmillu ilinniartoqarsinnaanani naatsorsuutini kisitsinik taamaallaat atuarnikkut. Nunami pisut pissutsillu amerlaqisut aatsaat paasineqarsinnaapput sivisunerusumik najugaqarfigineratigut. Ilinniakkami ilikkarsimasat piviusumi misilerarneqaleraangamik iluatsittuaannangillat. Naatsorsuutilli inernerit tassatuaannaangillat sumiiffigisamik ilisimasaqarnermik tunngavillit. Piginnaasat allat aamma pisariaqarput - aamma imaangilaq taakku piginnaasat nunatsinni pigiuannarigut. Taamaappallu, uanga ajortussaqaartinngilara piginnaasanik pissarsiniarluni nunanik allaneersunik tikisitsinissaq. Uannut pingaarnerpaajuvoq suliffeqarfiutitta piginneqatigiiffiusut ernumanangitsumik qajannaatsumillu inissisimanissaat, inuiaqatigiinnilu naammassisassaminnik naammassinnissinnaanissaat. Ilimagilluinnarpara Naalakkersuisut ilisimasaqassuseq piviusorsiornerlu tunngavigalugit siulersuisunut ilaasortanik toqqaasartut. Naatsorsuutigaara Naalakkersuisut isumannaartaraat siulersuisuni ilaasortat suliassaminnik naammassinnissaminnut piginnaasaqassasut ilisimasaqarlutillu. Piginnaasat ilagivaat inuiaqatigiinnut sukumiisumik ilisimasaqarneq. Taamaakkaluartorli siulersuisuni ilaasortat sumi najugaqarnerat uannut pingaarnerpaajungilaq. Taamaattumik siunnersuutigisaaq taamatut isikkoqartillugu itigartippara.